

**Facebook Tanda Putera mohon maaf kepada Kit Siang berhubung gambar kencing Malaysian Insider
Sept 13 , 2013
OLEH DIYANA IBRAHIM**

Laman Facebook rasmi filem kontroversi Tanda Putera hari ini memohon maaf secara terbuka berhubung gambar dikatakan Lim Kit Siang kencing di tiang bendera rumah bekas Menteri Besar Selangor, Datuk Harun Idris, selepas setahun kesilapan itu berlaku.

Pihak pentadbiran laman sosial itu, salah seorang daripada pengendali laman rasmi filem itu menerima sekeping gambar yang dihantar daripada pengguna internet.

"Admin masa tu, kawan kita gak, terima link dari pengunjung yang hantar gambar Lim Kit Siang dan caption salah. Admin muda kita pun bukan sengaja, dia ingat benda tu betul, dia upload," katanya di laman Facebook berkenaan.

Pentadbir laman itu berkata, gambar itu dipadam apabila menyedari berlaku kesilapan.

"Tapi didelete cepat bila penerbit sedar kesilapan itu. YB LKS ada menulis tentang kesilapan itu. Tapi semua cyber troopers marah dan serang Facebook kami. Gambar dan caption dah diturunkan," katanya merujuk kepada Penasihat DAP itu.

Pengendali akaun Facebook Tanda Putera itu juga menafikan mempunyai niat dengan sengaja untuk memuat naik dan menulis kapsyen gambar itu, tetapi ia sebenarnya dihantar oleh orang lain.

"Admin masa tu pun dah minta maaf. Penerbit pun dah minta maaf secara bertulis atas perkara tak sengaja itu. Tapi kami diminta buat ucapan mohon maaf itu dalam Facebook.

"Tak ada masalah, kami akan lakukan. Gambar serta caption tersebut bukan ciptaan kami tapi dihantar kepada kami. Ini antara episod dalam sejarah Tanda Putera yang sering menjadi bahan politik bukan atas kehendak kami. Terlalu banyak tuduhan palsu dan tanpa asas dibuat mengenai filem ini dan penerbitnya. Tetapi kami tak akan melatah dan ambil tindakan bagi setiap tohmahan – hanya yang dikira perlu sahaja," katanya.

Terdahulu bekas pegawai atasan polis, Tan Sri Yuen Yuet Leng tampil mengesahkan insiden kencing di hadapan kediaman Menteri Besar Selangor pada 13 Mei 1969 itu adalah rekaan semata-mata.

Menurut Lim Kit Siang, Yuen mengatakan kalau memang ada orang yang berani berbuat demikian, tidak mungkin dia dapat meninggalkan kediaman Menteri Besar Selangor itu dalam keadaan bernyawa. - 13 September, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/facebook-tanda-putera-mohon-maaf-kepada-kit-siang-berhubung-gambar-kencing>

